

四庫全書

子部

欽定四庫全書

子部

名賢氏族言行類稿卷三十四

詳校官典籍臣潘奕雋

主事臣祁韻士覆勘

總校官進士臣朱 鈐

校對官主事臣馮 培

謄錄監生臣顧 聲

欽定四庫全書

名賢氏族言行類稿卷三十四

宋 章定 撰

董

五百九十三

姓纂黃帝之後也已姓國有颶叔安生董父舜賜姓  
董氏晉有董狐董安于

左宣公二年孔子曰董狐古之良史也書法不隱

昭公二十九年蔡墨曰昔董父甚好龍龍多歸之乃擾

畜龍以服事帝舜賜姓曰董氏曰秦龍

定公十三年邯鄲將作亂董安于聞之告趙孟曰先備  
諸趙孟曰晉國有命始禍者死安于曰與其害於民  
寧獨我死請以我說

史記董仲舒廣川人也治春秋為博士下帷講誦弟子  
以次授業或莫見其面朝廷如有大議使使者就其  
家而問之其對皆有明法有王佐之才伊呂亡以加  
管晏殆不及 下帷發憤潛心大業今後學者有所

統一為羣儒首 三策言天人大槩

後漢酷吏董宣字少平為洛陽令搏擊豪強莫不震懾  
京師號為卧虎歌曰抱鼓不鳴董少平 光武敕曰  
強項令

董鈞字文伯習慶氏禮永平初為博士時草創五郊祭  
祀及宗廟禮樂威儀章服輒令參議多見用當世稱  
為通儒

方術董扶字茂安少遊太學 靈帝時拜侍中甚見器

重褒秋毫之善貶纖介之惡

魏志董昭字公仁太祖引坐問計才策謀畧世之奇士  
蜀志董和字幼宰為成都令時俗奢侈和躬率以儉所  
在皆移風變善畏而不犯遷益州太守

董允字休昭宮中之事無大小悉以咨之遷侍中獻納  
之任允皆專之

吳志董襲字元代會稽人志節慷慨武毅猛烈遷偏將  
軍

晉儒林董景道字文博明春秋三傳易書詩皆精究大義

隱逸董京字威輦初至洛陽逍遙吟咏常宿白社中後遁去莫知所之

隱逸董養字仲道不干祿求榮

南史孝義董陽三世同居詔榜門曰篤行董氏之間

見劉

瑜傳

北史董紹字興遠少好學頗有文義累遷中書舍人為

宣武所賞

董純字德厚隋時以軍功勞舊拜左衛將軍

儒林董徵字文發徧受諸經大義精練宣武詔徵教授  
諸王累遷安州刺史過家置酒高會曰腰龜反國  
昔人稱榮仗節還家云胡不樂

孝行董洛生居父喪過禮詔遣溫紹伯奉璽書慰之令  
自抑割以全孝道

唐董晉字混成河中人擢明經肅宗幸彭原上書行在



拜祠部郎中 德宗立授御史中丞出為華州刺史朱泚反晉走行在至河中而李懷光反晉說之曰朱泚為臣而背其君苟得志於公何有故懷光雖偃蹇亦不助泚改尚書左丞時右丞元琇為韓滉排笮得罪滉勢振朝廷晉見宰相誦琇非罪士大夫壯其節 貞元五年同平章事

宋朝董遵誨范陽人也太祖以西夏近邊使守通遠軍凡十四年蕃漢悅附許以便宜制軍事初太祖以其母在契丹也令人賂邊民使迎其母送於遵誨遵誨遣外弟劉宗貢

馬以謝太祖解其所服真珠盤龍衣命賁賜之宗曰遵誨人臣豈敢當此太祖曰吾委以方面不此嫌也

董敦逸字夢授吉州永豐人也舉進士 紹聖初除監察御史改工部員外郎遷殿中侍御史左司諫侍御史敦逸曰臣再污言路第恐擠逐不能久奉彈糾之責哲宗曰汝能言無患朕之不能聽汝言信無患朕之不能行俄出知興國軍徙江州 徽宗即位以直龍圖閣知荆南府召入為諫議大夫敦逸極言蔡卞過惡遷戶部侍郎卒

孔五百九十四

姓纂子姓殷王帝乙長子微子啟受封於宋弟微仲衍曾  
孫慙公生弗父何生宋父周生世父勝生正考父生孔父  
嘉子孫以王父字為氏孔父生木金木金生畢夷父畢夷  
父生防叔仕魯為大夫生伯夏伯夏生耶紇耶紇生丘字  
仲尼三歲仲尼父卒年十九娶宋亓官氏一歲生鯉字伯  
魚孔子為魯司寇攝相事居郕邑昌平鄉闕里魯哀公十  
六年卒年七十二伯魚年五十先仲尼卒伯魚生伋字子

思為魯穆公師作中庸及子思子四十七篇以祖業授弟子孟軻等伋生子上白白生子家求

左昭公七年孟僖子曰吾聞將有達者曰孔丘其祖弗父何  
以有宋而授厲公及正考父佐戴武宣三命茲益恭故其  
鼎銘曰一命而僂再命而傴三命而俯其恭也如是臧孫  
紇有言聖人有明德者若不當世其後必有達人今其將  
在孔丘乎

文公四年晉人歸孔達於衛以為衛之良也

僖公三年楚人伐鄭鄭伯欲成孔叔不可曰齊方勤我  
棄德不祥

僖公二十四年鄭伯與孔將鉏石甲父省視官具於汜  
而後聽其私政禮也

前漢孔安國孔氏有古文尚書安國以今文字讀之因  
以起其家

孔光字子夏經學尤明舉方正為大夫兄弟妻子燕語  
不及朝省政事或問溫室省中樹皆何木光默不應

荅以它語賜靈壽杖歸老於第凡為御史大夫丞相各再居公輔位前後十七年

後漢孔奮字君魚守姑臧長爵關內侯力行清潔為衆所笑以為身處脂膏不能自潤被徵吏民羌胡賦斂馬牛器物追送之無所受

孔融字文舉十歲見李膺語門者曰我是李君通家子弟膺問之融曰先君孔子與君先人李老君同德比義而相師友則融與君累世通家為北海相立學校表顯儒

術雖一介之善莫不加禮 坐上客常滿樽中酒不空

薦達賢士多所獎進海內英俊皆信服之

孔僖字仲和魯國魯人世傳古文尚書毛詩與崔駰友善同  
遊太學習春秋因讀吳王夫差時事僖廢書歎曰若是所  
謂畫虎不成反為狗者駰曰然昔孝武皇帝始為天子年  
方十八崇信聖道師則先王五六年閒號勝文景及後恣  
已忘其前之為善僖曰書傳若是多矣鄰房生梁郁儻和  
之曰如此武帝亦是狗耶僖駰默然不對郁怒恨之陰上

書告駟僖誹謗先帝刺譏當世事下有司駟詣吏受訊僖乃上書肅宗自訟曰凡言誹謗者謂實無此事而虛加誣之也至如孝武皇帝政之美惡顯在漢史坦如日月是為直說書傳實事非虛謗也齊桓公親揚其先君之惡以唱管仲然後羣臣得盡其心今陛下乃欲為十世之武帝遠諱實事豈不與桓公異哉書奏帝立詔勿問拜僖蘭臺令史帝東巡狩還過闕里以太牢祠孔子及七十二弟子作六代之樂大會孔氏男子二十以上者六十三人命儒者



講論僖因自陳謝帝曰今日之會寧於卿宗有光榮乎對  
曰臣聞明王聖主莫不尊師貴道今陛下親屈萬乘辱臨  
敝里此乃崇禮先師增輝聖德至於光榮非所敢承帝大  
笑曰非聖者子孫焉有斯言乎拜僖郎中使校書東觀拜  
臨晉令崔駰以家林筮之謂為不吉止僖曰子盍辭乎僖  
曰學不為人仕不擇官吉凶由已而由卜乎在縣三年卒  
遺令即葬二子長彥季彥並十餘歲蒲坂令許君然勸令  
反魯對曰今載柩而歸則違父令舍墓而去心所不忍遂

留華陰 長彥好章句學 季彥守其家業門徒數  
百人河西大雨雹大者如斗詔有道術之士極陳變  
青季彥見於德陽殿帝親問之舉孝廉不就

孔昱字元世七世祖霸成帝時歷九卿自霸至昱爵位  
相係卿相牧守五十三人列侯七人

晉書孔愉字敬康會稽人封餘不亭侯嘗行經餘不亭  
見籠龜買放溪中龜中流左顧者數四及鑄侯印而  
印龜左顧三鑄如初

孔汪字德澤為廣州刺史甚有政績為嶺表所稱

孔坦字君平為揚州別駕遷尚書左丞深為臺中之所敬憚  
孔巖字彭祖拜吳興太守善於宰牧甚得人和

孔羣字敬林有智局志尚不羈仕歷中丞 子沉字德  
度何充薦於王遵曰文思通敏宜登宰門辟丞相司  
徒掾不就 沉子厥至吳興太守厥子琳之以草書  
擅名又為吳興太守

儒林孔衍字舒元十二通詩書後領太子中庶子經學

深博練識舊典朝儀軌制多取正焉

南史孔靖字季恭祖愉季恭為會稽內史釐整浮華剪  
罰遊惰境內肅清修飭學校督課誦習宋初拜侍中  
子靈符位會稽太守弟靈運位著作郎 靈運子  
琇之有吏能遷尚書左丞以職事知名為臨海太守  
在任清約罷還獻乾薑三千斤

孔奐字休文仕梁除晉陵太守清白自守秩俸分贍孤  
寡號曰神君 陳文帝徵為御史中丞性剛直多所

糾朝廷甚敬憚之百司滯事皆付之決為吏部尚書  
識鑒人物詳練百氏凡所甄拔衣冠搢紳莫不悅服  
孔琳之字彥琳曾祖羣琳之妙善草隸仕宋為御史中  
丞明憲直法無所屈撓

孔覲字思遠琳之之孫除為長史不能屈意權幸醉日  
居多而明曉政事醒時判決未嘗有壅衆咸云孔公  
一月二十九日醉勝世人二十九日醒也

孔過字出遠為尚書儀曹郎屢歲闕禮齊高帝曰過真

所謂儀曹不忝厥職

孔稚珪字德璋門庭之內草萊不剪以蛙鳴當兩部鼓吹  
後為都官尚書

孔休源字慶緒舉秀才徐孝嗣省其策曰可謂後生之  
準的梁初為太學博士為建康獄正尚書左丞遷御  
史中丞正色直繩無所迴避行荊州事平心決斷請  
託弗行

儒林孔奩會稽人通五經尤明三禮三為五經博士後

為海鹽山陰二縣令

文學孔廣字淹源才學知名王儉常云廣來使人廢簿  
領匠不須來來則莫聽去

孔道抗直有才藻製東都賦於時才士稱之並附丘巨源傳  
隱逸孔淳之字彥深少有高尚愛好墳籍居剡縣性好  
山水每游必窮其幽峻旬日忘歸

孔道徽守志業不仕隱居南山終身不窺都邑鄉里宗  
慕之父祐隱於四明山行動幽祇德標松桂古之遺德

也

北史孔伯恭獻文時號鎮東將軍大破宋將沈攸之陳  
顯達之師

唐孔穎達字仲達冀州人八歲時就學誦記日千餘言  
閻記三禮義宗善屬文通步歷大業初舉明經高第  
煬帝召天下儒官集東都詔國子秘書學士與論議  
穎達為冠又年最少老師宿儒耻出其下 太宗即  
位穎達數以忠言進帝問孔子稱以能問於不能以



多問於寡對曰此聖人教人謙耳帝稱善以太子右庶子兼司業 子惠元又為司業三世司業時人美之

孔巢父字弱翁孔子三十七世孫德宗狩奉天為招討使為魏博宣慰使辨而才及見田悅與言君臣大義孔戣字君嚴擢進士第巢父從子擢諫議大夫出為華州刺史奏罷明州歲貢淡菜蚶蛤 穆宗立召為左丞以老自乞韓愈謂曰公尚壯上三留何去之果戣

曰吾年至一宜去吾為左丞不能進退郎官二宜去  
愈曰公無留資何恃而歸曰吾負二宜去尚奚顧子  
言愈上疏言戮守節清苦論議正平憂國忘家用意  
至到今求退陛下若不聽許亦無傷義而有貪賢之  
美不報以禮部尚書致仕歲致羊酒如徵士禮

孔緯字化文棧孫登進士第擢御史中丞疾惡若仇中  
外聞風未繩輒肅三遷吏部侍郎權要私謁至盈几  
一不省從僖宗到蜀度朱玫必反請幸梁州即日

去而攻兵至微緯言幾不脫

孔溫業字遜志擢進士第大中時為吏侍求外官白敏中謂同列曰我輩須自點檢孔吏部不肯居朝廷矣  
幾之弟子也

孔若思越州人祖紹安與孫萬壽皆以文辭稱若思以博學聞擢明經歷庫部郎中嘗曰仕宦至郎中足矣  
座右置止水一石明自足意

孔季詡字季和若思之弟永昌初擢制科授校書郎陳

子昂常稱其神清韻遠比衛玠

孔至字唯微若思子歷著作郎明氏族學撰百家類例  
宋朝孔宗旦魯人也為邕州司戶叅軍初儂智高潛聚溪洞  
而邕州有白氣起郡庭仍江水暴溢宗旦以為兵象  
策智高必反以書告郡守陳珙珙不聽後智高反立  
忠節

孔道輔字原魯初名延魯孔子四十五世孫舉進士為  
寧州推官道士治真武像有蛇穿其前郡將帥其屬

往奠拜之道輔持笏碎蛇首而去一郡皆驚知曲阜  
縣天聖九年為右正言上書請太后歸政天子而廷  
奏樞密使曹利用御藥羅崇勲罪狀當是時崇勲操  
權利而利用悍彊不遜內外憚之使契丹契丹主酌  
以大庖曰天寒飲此可以致和氣道輔曰不和固無  
害既還言者以為生事且開邊釁他日仁宗問之對  
曰契丹新為黑水所被勢甚蹙平時漢使至多以言  
相侮臣恐其益慢中國故答以此言仁宗然之除右

諫議大夫御史中丞皇后郭氏廢道輔率諫官御史  
伏閣請對仁宗令至中書宰相呂夷簡曰廢后有漢  
唐故事道輔曰大臣當導君以堯舜漢唐失德可為  
法邪夷簡色沮子宗翰為刑部侍郎

孔維字為則開封雍丘人也以九經及第為國子周易  
博士遷禮記博士使高麗王治問禮維以君臣父子  
之道升降等威之序為對治大悅謂人曰吾今日復  
見中國之夫子也累擢國子司業上書請禁原蠶以

利國馬樂史奏曰陛下降明詔有事於籍田而禁蠶  
之制又下豈不相戾哉維復上䟽曰周禮夏官司馬  
職禁原蠶者為傷馬也月令仲春祭馬祖季春享先  
蠶為馬祈福謂之馬祖為蠶祈福謂之先蠶是蠶與  
馬同其類爾蠶重則馬損氣感之然也臣謂依周禮  
禁原蠶為當太祖是其言拜國子祭酒

孔宜字不疑兗州曲阜人也蓋孔子四十四世孫孔子  
生鯉鯉生伋伋生白白生永永生箕箕生穿穿生謙

譙生鮒以弟子騰為嗣值秦難藏其家書於屋壁騰  
生正生武武生延年及安國延年生霸號褒成君  
霸生福福生房房生均封褒成侯王莽敗失國世祖  
復封均子志為褒成侯志生損襲爵徙封褒亭侯損  
卒子曜嗣曜卒子完嗣無子以弟之子羨襲爵魏時  
封宗聖侯羨生震晉時徙封奉聖亭侯震生嶷嶷生  
撫撫生懿懿生鮮宋時襲封奉聖亭侯鮮生乘後魏  
封為崇聖大夫乘生靈珍靈珍生襲爵改封崇聖侯



靈珍生文泰文泰生渠北齊改封恭聖侯後周追封  
孔子為鄒國公以渠襲封渠生長孫隋封長孫為鄒  
國公長孫生嗣哲改封紹聖侯嗣哲生德倫唐封褒  
聖侯德倫生崇基襲封崇基生璿之明皇詔追諡孔  
子為文宣王改封褒聖侯璿之襲文宣公遂之生萱  
襲封萱生齊卿齊卿生惟旺惟旺生策自璿之至策  
五世並襲封文宣公策生振振生昭儉自策至昭儉  
三世歲給封絹以供祀享昭儉生光嗣光嗣生仁玉

後唐時襲文宣公至周時為曲阜令宜仁玉子也乾  
德中詣闕上書述其家世詔以曲阜簿襲封文宣公  
未幾通判密州太宗北征受詔督軍糧涉拒馬河溺  
死年四十六子延世字茂先以父死為曲阜簿改  
曲阜令襲封文宣公詔轉運使兗州長吏待以賓禮  
卒年三十八延世子聖佑真宗東封泰山幸曲阜  
謁孔子廟行酌獻之禮又幸孔林觀其墓加謚孔子  
為至聖文宣王追封孔子父叔梁紇齊國公母顏氏

魯國夫人妻开官氏鄆國夫人擢聖佑為奉禮郎襲  
封文宣公知仙源縣後改名佑佑卒以宗愿襲封知  
仙源縣宗愿距孔子四十七世矣 仁宗封孔子後  
為衍聖公哲宗時改為奉聖公徽宗時復以為衍聖  
公云

孔文仲字經父新淦人也舉進士又舉賢良對策極論  
新法之害不為王安石所喜黜不用

孔武仲字常父舉進士後除起居舍人數月拜中書舍

人直學士院遷禮部侍郎以寶文閣待制知洪州

孔平仲字毅父舉進士徽宗即位召為戶部外郎出使  
陝西帥鄜延環慶在宋朝以文章名世父子兄弟齊  
名者甚眾若三蘇三劉三沈三孔則其章章尤著者  
也元祐初起司馬溫公於洛陽公入謝力薦經父與  
蘇子瞻乞先用此二人方敢奉詔朝廷皆除省官經  
父四遷中書舍人諫議大夫方且大用遽云亡搢紳  
惜之毅父史學尤精工於集句又有詩戲三公術業

不同其大槩皆一世英家曾懋叔夏兄弟乃其甥也  
並知名當世其問學源流蓋有所自云

鞏  
五百九十五

左傳周卿士鞏簡公甸內侯也晉有鞏朔漢有侍中鞏  
攸陽翟皇戶部郎中鞏宏武

奉  
五百九十六

重隴並見何氏姓苑

項  
五百九十七

左傳云滅項公羊曰為齊桓公所滅子孫以國為姓項  
橐八歲服孔子項燕下相人為楚將子梁梁兄子籍  
號西楚霸王項他項伯項襄並籍之族漢初並封賜  
姓劉氏

史 五百九十八

姓纂周太史佚之後以官為氏漢有史皇孫進

論語子曰直哉史魚邦有道如矢邦無道如矢

左襄公三十年史趙曰亥有二首六身下二如身是其

日數也 魯使者在晉歸語季武子曰晉未可殽也  
有趙孟以為大夫有史趙師曠而咨度焉其多君子  
也

昭公七年史朝夢康叔謂已余將命而子苟相元晉韓  
宣為政之歲媯始生子名曰元

哀公九年晉趙鞅卜救占諸史趙史墨史龜史龜曰是  
謂沈陽可以興兵利以伐姜

哀公二十年吳王曰史黯何以得為君子趙孟曰進不

見惡退無謗言王曰宜哉

後漢史弼字公謙陳留人出為平原相詔書下舉鉤黨  
弼獨無所上濟活者千餘人遷河東太守被詔當舉  
孝廉知多權貴請託迺豫敕斷絕書屬

史叔賓陳留人少有盛名郭林宗見而告人曰牆高基  
下雖得必失後果以論議阿枉敗名

北史史寧字永和以軍功累加持節征東將軍突厥憚  
之曰此中國神智人也寧有謀畫識兵權臨敵指撝



皆如其策 子雄字世武除驃騎大將軍弟祥字世休少有文武才幹拜驍衛大將軍

史萬歲少英武驍健若飛好讀兵書在隋以平尉遲迥之功拜上大將軍 前後七百餘陣戰鬪千里破諸夷三十餘部於是勒石頌美隋德

紀 五百九十九

姓纂姜姓炎帝之後封紀為齊所滅以國為姓漢有紀信弟成生通封襄平侯

金史卷三十四  
前漢紀信信乘上車

晉紀瞻字思遠少以方直知名舉秀才召拜尚書郎才  
兼文武朝廷稱其忠亮雅正卧護六軍 明帝嘗獨  
引瞻於廣室慨然憂天下曰社稷之臣欲無復十人  
如何因屈指曰君便其一 南金東箭世胄高門望  
重搢紳官成名立

南史文學紀少瑜字幼瑒幼有志節嘗夢陸倕以一束  
青鏤管筆授之其文因此益進有大才而無貴仕

恩倖紀僧真仕齊 武帝嘗曰僧真堂堂貴人所不及也諸權要中最被盼遇

是 六百

姓纂齊大夫之後也北海吳志氏儀本姓氏孔融嘲儀曰氏者民無上可改為是因姓是焉

吳志是儀字子羽本姓氏孔融嘲儀言氏字民無上可改為是遂改焉忠亮公正之士輔太子為傅盡忠動軌規諫事上勤與人恭拯贍貧困家無儲蓄時時有

所進達未嘗言人之短拜尚書僕射

士  
六百一

姓纂帝克之裔杜伯之子隰叔為晉士師至士為生  
司空穀穀生士會子孫氏焉後漢末有交趾太守士  
燮

左襄公十六年晉平公即位士鞅為公族大夫改服修  
官烝於曲沃

十八年士匄荀偃以中軍克京茲

宣公十二年晉師救鄭士會將上軍郤克佐之

十五年晉侯賞士伯以瓜衍之縣曰吾獲狄土子之功也

成公十八年晉悼公即位使魏相士魴為公族大夫使訓卿之子弟共儉孝弟

莊公二十六年晉士為為大司空夏城絳以深其宮

子 六百二

姓纂帝嚳之裔子姓承殷湯風俗通云左傳有子鉏

商鄭大夫子人九

左襄公三十一年子產之從政也擇能而使之子太叔美秀而文鄭國將有諸侯之事乃授使行之以應對賓客是以鮮有敗事

新序陳恒使勇士刳子淵棲曰子之欲我以我為知乎臣弑君非知也以我為仁乎見利背君非仁也以我為勇乎刳我以兵懼而與子非勇也使吾無此三者何補於子若有此三者終不從子矣

新序子罕宋人有得玉者獻諸司城子罕子罕曰我以  
不貪為寶

子列子窮容貌有飢色客有言於鄭子陽者曰子列子有  
道之士也居君之國而窮子陽使官遺之粟數十乘

理 六百三

咎繇為堯理官子孫遂為理氏殷末有理徵改姓李氏  
里 六百四

本理氏春秋改焉晉有里克魯有里革鄭有里析後居

襄城者又為相里氏

遂

六百五

左傳楚大夫遂章之後有遂子憑遂罷遂掩

為

六百六

晉士為之後以王父字為氏

闕

六百七

國語有闕大夫

氏

六百八



北海氏儀氏改為是見上文

芊

六百九

楚姓祝融子季連後漢初楚懷王孫芊心項羽封為楚懷王後為義帝

俟

六百一十

風俗通俟子著書六國時人 河南後魏獻帝以次第為俟亥後為俟氏官氏志俟奴氏改為俟氏

杞

六百十一

姒姓夏禹之後周武王封東樓公於杞後為楚所滅子  
孫氏焉齊郡齊有杞殖字梁今齊州有杞氏

被

六百十二

呂氏春秋鄭有大夫被瞻風俗通漢有牂柯太守被條

梓

六百十三

左傳魯大夫梓慎

弭

六百十四

三輔決錄云王莽時有弭强 新豐漢末新豐人弭仲

升見決錄也

姁 六百十五

姁殍几見纂要文云人姓

錡 六百十六

左傳殷人六族有錡氏漢書藝文志洛陽錡華後有荆

州刺史錡嵩

委 六百十七

周禮有委人氏掌委積其後氏焉漢有太原太守委進

飢 六百十八

古委字纂文云人姓

姁 六百十九

史記夏后氏姁姓

似 六百二十

官氏志姁先改名似

紙 六百二十一

官氏志渴侯氏改為紙氏

倚 六百二十二

左傳楚左史倚相之後

綺 六百二十三

漢初四皓隱商山號綺里季其後為綺氏

紫 六百二十四

何氏姓苑有紫氏

壘 六百二十五

後趙錄有壘本姓裴氏後改壘

癸

六百二十六

齊癸公之後見姓苑

尾

六百二十七

魯有尾生或云即微生高

鬼

六百二十八

古今人表鬼臾區

米

六百二十九

姓纂出西域米國

宋朝米黻字元章少負英聲前輩鉅公皆器重之東坡先生  
尺牘有云嶺南八年念吾元章邁往凌雲之氣清雄  
絕俗之文超妙入神之神字何時見之今真見之矣又  
兒子於何處得寶月觀賦琅然誦之老夫卧聽未半  
蹶然而起恨二十年相從知元章不盡此賦當過古  
人不論今世也公當有大名不勞我輩說也雖高宗  
天縱日躋雲章洛畫超軼前古獨愛元章萬幾之暇  
朝夕披玩以元章平生篆刻真行草書刻石分為十

卷風檣陣馬沉著痛快當與鍾王抗行非但不愧之  
而已其子友仁字元暉少俊早成山谷有元暉古印  
章因命以為字仍贈絕句其文詞書畫深得家法紹  
興間為工部侍郎待制敷文閣韻語陽秋載其不及  
陪東坡往金山作水陸與棲雲閣二詩謂其超出翰  
墨畦逕之表蓋自邁往凌雲之氣流出非尋規索矩  
者之可到也



姓纂平原後漢人

後漢禰衡字正平尚氣剛傲矯時慢物嘗陰懷一刺既而無所之適至於刺字漫滅孔融薦之曰鷙鳥累百不如一鶚使衡立朝必有可觀

禮 六百三十一

左傳衛大夫禮孔禮至漢有新市長禮賢 平原後漢禮震受尚書於歐歆

邱 六百三十二

風俗通漢有三郡太守郎社

啟 六百三十三

夏后啟之後以王父字為氏後燕有啟崙

洗 六百三十四

又音線南海人見姓苑

解 六百三十五

晉大夫解楊解獵之後其先食采於解因氏焉漢有御

史大夫解楊 晉有解系解結



名賢氏族言行類稿卷三十四

欽定四庫全書

名賢氏族言行類稿卷三十五

宋 章定 撰

李 六百三十六

姓纂帝顓頊高陽之裔顓頊生大業大業生女莘女  
莘生咎繇為堯理官子孫因姓理氏云裔孫理徵得  
罪於紂其子利貞逃難伊侯之墟食木子得全因變  
姓李氏利貞十一代孫老君名耳字伯陽居苦縣賴

鄉曲仁里曾孫曇生二子崇璣崇子孫居隴西璣子  
孫居趙郡崇五代孫仲翔生伯考伯考生尚尚生廣  
也廣之後生唐高祖李淵

史記老子姓李名耳字伯陽諡曰聃周守藏室之史也  
孔子問禮於老子著書言道德之意五千餘言

子名宗宗為魏將封於段干宗子注注子宮宮玄孫  
假假仕於漢文帝假子解為膠西王卬太傅

李斯楚上蔡人也從荀卿學帝王之術西說秦王以為

丞相下禁書之令

李廣隴西成紀人也才氣天下無雙 文帝曰惜廣不  
逢時令當高祖時萬戶侯豈足道哉廣行無部伍行陣  
人人自便不擊刁斗莫府省約文書匈奴號曰飛將  
軍結髮與匈奴大小七十餘戰以石為虎射之沒矢  
太史公曰李將軍悛悛如鄙人口不能道辭及死  
之日天下知與不知皆為盡哀諺曰桃李不言下自  
成蹊 廣子三人曰當戶椒敢為郎當戶子陵

李蔡廣之從弟封樂安侯

李息郁邳人為材官將軍軍馬邑凡三為將軍

李沮雲中人為彊弩將軍

佞幸李延年中山人也女弟得幸號李夫人延年善歌  
為新變聲為協律都尉

李陵字少卿所將皆荆楚勇士奇才劍客力扼虎射命  
中願得自當一隊持步卒五千深蹂戎馬之地矢盡  
而降司馬遷以為有國士之風雖古名將不過也



李廣利為貳師將軍伐勝大宛封海西侯

李尋字子長平陵人好洪範災異又學天文月令陰陽推論日月五星之對最有理流放以卒遂無傳焉

後漢李通字次元南陽人素聞其父說讖云劉氏復興李氏為輔往迎光武言讖事遂相結定舉兵

後漢李忠字中都光武時遷丹陽太守起學校習禮容春秋鄉飲選用明經郡中向慕之流民占著五萬餘口奏課為天下第一

李法字伯度漢中人博通羣書應賢良對策除博士遷光祿大夫上疏言宦官權重椒房寵盛坐免徵為諫議大夫正言極辭無改於舊

李恂字叔英拜兗州刺史以清約率下常席羊皮服布被徵拜謁者使持節領西域副校尉諸國數遺奴婢宛馬金銀香罽之屬一無所受

文苑李尤字伯仁少以文章顯和帝召詣東觀受詔作賦拜蘭臺令史

李卻字孟節南鄭人也通五經善河洛風星縣名署幕  
門候吏和帝即位分遣使者微服單行州縣觀採風  
謠使者二人當到益部投卻候舍時夏夕露坐卻因  
仰觀問曰二君發京師時寧知朝廷遣二使邪二人  
默然驚相視曰不聞也何以知之卻指星示云有二  
使星向益州分野故知之耳後其使者一人拜漢中  
太守召署戶曹吏時竇憲納妻天下郡國皆有禮慶  
郡亦遣使卻進諫曰竇將軍椒房之親不修禮德而

專權驕恣危亡之禍可翹足而待願明府一心王室  
勿與交通太守固遣之卻不能止請求自行許之卻  
遂所在留遲以觀其變行至扶風而憲就國自殺凡  
交通憲者皆為免官唯漢中太守不豫焉子固字子  
堅漢中人貌狀有奇表鼎角匿犀足履龜文少好學  
步行尋師不遠千里四方有志之士多慕其風而來  
學子變字德公拜議郎所交皆舍短取長成人之  
美

李膺字元禮潁川人為青州刺史守令畏威多望風棄  
官荀爽謁膺因為其御喜曰今日乃得御李君拜司  
隸校尉黃門常侍鞠躬屏氣休沐不敢出宮省曰畏  
李校尉獨持風裁以聲名自高士有被其容接者名  
為登龍門

酷吏李章五世二千石拜陽平令大姓趙綱所在為害  
章手劍斬之吏人遂安

獨行李業字巨游志操介特公孫述徵之不起賜以藥

酒光武詔表其間

儒林李育字元春習公羊春秋知名太學後拜博士論  
五經於白虎觀最為通儒

獨行李充字大遜兄弟同衣遮食妻思分異乃逐其妻  
延年中詔舉隱士大儒務取高行以勸後進徵充為  
博士後年八十以為國三老賜以几杖

方術李南字孝山少篤學明於風角

魏志李典字曼成遷破虜將軍吳孫權戰於合肥以步

卒八百破賊十萬古用兵未之有也可謂國之爪牙  
好學問貴儒雅不與諸將爭功敬賢士大夫恂恂若  
不足軍中稱其長者

李通字文達以俠聞江汝之間拜征南將軍兄緒屯樊  
城

蜀志李嚴字正方少為郡職吏以才幹稱後廢為民子  
豐為江州都督

李譔字欽仲五經諸子無不該覽博好技藝算術卜數

醫藥弓弩機械之巧咸致思焉以為庶子

李平字正方孔明與蔣琬董允書曰陳孝起震前為吾  
說正方腹中有鱗甲鄉黨以為不可近吾以為鱗甲  
者但不當犯之耳

李恢字德昂平定南土軍功居多加安漢將軍

晉書李憺字季和遷御史中丞當官正色不憚彊禦百  
僚震肅

李膺字宣伯遷御史中丞恭恪直繩百官憚之使領司



隸校尉

李重字茂曾遷尚書吏部郎務抑華競不通私謁出為平陽太守崇德化修學校表篤行校賢能正身率下李含字世容二郡並舉孝廉

李矩字世迴領河東平陽太守時饑饉疫厲垂心撫恤百姓賴焉

孝友李密字令伯奉事祖母以孝謹聞徵為太子洗馬以祖母年高上疏不應命後為溫令遷漢中太守

文苑李充字宏度善楷書妙叅鍾索著學箴征北將軍  
褚裒引為參軍充以家貧苦求外出裒將許之為縣  
試問之充曰窮猿投林豈暇擇木乃除剡縣令子顥  
亦有文義郡舉孝廉兄式以平隱著稱善楷隸仕至  
侍中

周顥母李氏字絡秀生顥及嵩並列顯位

載記李產字子喬少剛厲有志格慕容儁時歷位尚書  
剛正好直言每進見未嘗不論朝政之得失同輩咸

憚焉轉太子太保謂子績曰以吾之才而致於此始者之願亦已過矣不可復以西夕之年取笑於來今固辭而歸子績字伯陽少以風節知累遷太子中庶子

南史李安仁少有大志常拊髀嘆曰大丈夫處世富貴不可希取三將五校何難之有仕齊為領軍將軍遷左僕射退為吳興太守於家載米往郡時服其清

子元履幼有操業甚嫻政體仕梁為衡廣青冀四州

刺史

李膺字公胤有才辨為益州別駕

李珪之字孔璋位尚書右丞歷職稱為清能

李義字慶緒父為人所害手刃其仇將義而釋之後為  
巴郡太守號良吏

北史李先字容仁道武時遷博士帝問先何者可以益人神  
智先曰唯有經書三皇五帝政化之典可以補王者  
神智後詔有司曰先所知者軍國大事自今常宿於

內 孫預字元凱歷祕書令

李訢字元盛太武曰李訢後必官達益人門戶又曰觀此人舉動豈不異於衆也必為朕家幹事臣為相州刺史獻文以其政為諸州最加賜衣服後見廢張謹與語奇之曰此佳士也終不久屈未幾為太倉尚書李靈字武符太武徵天下才雋靈至拜中書博士

李元忠少厲志操居喪以孝聞家素富在鄉多出貸求利元忠焚契免責鄉人甚敬之拜趙郡太守見神武

進從橫之策深見嘉納後拜侍中常言作僕射不勝  
飲酒樂耳

李渾字季初後燕散騎常侍聘梁 梁武帝曰伯陽之  
後久而彌盛趙李人物今實居多

李璿字世顯容貌魁偉後為兗州刺史

李德饒字世文仕隋轉監察御史糾正不避權貴德行  
為時所重性至孝丁父母憂甘露降於庭有鳩巢其  
廬因改所居村為孝敬村里為和順里

李公緒字穆叔沉冥樂道誓心不仕明天文圖緯之學  
李順字德正博涉經史有計策後為四部尚書凡使涼  
州十二回使河西歸曰禮者德之興敬者身之基  
沮渠蒙遜無禮不敬以臣觀之不復久矣

李孝真字元操射策甲科拜給事中兄弟並以文學自  
達後除黃門侍郎以美於詞令敕掌宣傳詔敕

李孝伯父曾道武時為趙郡太守令行禁止有賊於常  
山界得死鹿賊長謂趙郡地也責之還令送鹿故處

郡謠曰詐作趙郡鹿猶勝常山粟其見憚如此 孝  
伯博綜羣言動有法度太武徵為中散謂曰真卿家  
千里駒也 太武曰朕有一孝伯足理天下何用多  
為衣冠之士服其雅正軍國謀謨咸出孝伯美名聞  
於遠邇齊武帝曰北有李孝伯其為遠人所知若此  
兄祥字元善拜淮陽太守流人歸者萬餘家百姓安  
之遷河間太守有威恩之稱徵拜中書侍郎 子安  
世遷主客令齊使劉纘朝貢安世奉詔勞之美容貌



善舉止續等自相謂曰不有君子其能國乎 子瑒  
字琚羅氣尚豪爽公彊當世為統軍西征招募雄勇  
數百騎每有戰功軍中號曰李公騎 俶儻有大志  
篤於親知每曰士大夫學問稽博古今而罷何用專  
經為老博士也 弟謚字永和少好學周覽百氏唯  
以琴書為業有憤世之心初師孔璠後璠還就謚請  
業同門生語曰青成藍藍謝青師何常在明經屢辭  
徵辟謚曰真靜處士表其門曰文德里曰孝義 子

士謙字子約善天文術數稱為菩薩畢志不仕家富於財每以振施為務後出粟萬石以貸鄉人屢年不登責家無以償士謙對之燔契

李裔字徽伯試守博陵郡抑彊扶弱政以嚴威為名子子雄少慷慨有大志家世並以學業自通子雄獨習騎射曰文武不備而能濟功業者鮮矣仕隋拜鴻臚卿

李普濟學涉有名性和順位濟北太守語曰入麤入細

李普濟與從父弟悋並應秀才時謂其所居為秀才村

李義深有當世才用而心胸險峭語曰劍戟森森李義深仕齊遷齊州刺史弟幼廉文襄嘗求好長史以幼廉為并州長史累遷太僕大司農大理卿所在稱職結髮從官誓不曲意求人

李叔仁隴西人驍健有武力前後數從攻討以軍功封陳郡公

李彪字道固孝文時使齊遷祕書丞前後六度  
銜使命南人竒其謇博後為御史中尉性剛  
直多劾糾豪右屏氣帝常呼為李生其所  
彈劾應弦而倒赫赫之威振於下國肅肅之  
稱著於京師彪孫昶幼解屬文有聲洛下  
周文以為相府記室參軍後為納言常曰文  
章不足流於後世經邦致化庶及古人故作  
文了無稿草唯留心政事而已

李崇字繼長仕魏除兗州刺史村置鼓樓盜發即擒後為東道大使黜陟能否著賞罰之稱又都督淮南養壯士數千人寇賊侵邊所向摧破號曰卧彪 子世哲性傾巧善事人亦以貨賂自達世號為李錐 弟神軌 崇從弟平字雲定拜長樂太守政務清靜吏人懷之處機密十有餘年嘗為相州刺史前臺使好侵漁平乃畫虎尾踐薄冰於客館以示誠焉 子獎字遵穆有

當世才度 子構字祖基仕齊終太府卿 獎  
弟諧字虔和魏與梁和以諧口頰翩翩乃兼常  
侍往聘焉鄴下言風流者以諧為首

李元護仕齊位馬頭太守

李苗字子宣有文武才幹志尚功名嘗陳伐蜀及平江  
南之計後領統軍

李叔彪博聞有識度為鄉閭所稱

李賢字賢和忠孝之道實銘於心 子詢字孝詢以軍

功位大將軍 詢弟崇字永隆英果有籌算膽力過  
人除幽州總管突厥犯塞崇輒破之 賢弟遠字萬  
歲授河東郡守勸課農桑肅遏奸匪曾未朞月百姓  
懷之

李穆字顯慶芒山之戰脫周文於阬授武衛將軍周文  
嘆其忠節曰爵位玉帛未足為報後拜太師贊拜不  
名一門執象笏者百餘人

李弼字景和嘗曰大丈夫生世會須履鋒刃平寇難以

取功名安能碌碌依階以求仕以功名終

李慶和仕周為洛州刺史仁恕訓物獄訟為之簡靜

李延孫雄武有將率才畧在魏進車騎大將軍每以克

清伊洛為已任威振敵境

李近哲字彥少修立有識度

李彥字彥士仕魏歷尚書左右丞

李德林字公輔該博墳典陰陽緯候無不通涉舉秀才

累遷儀同周武帝授內史上士有大才用勝於麒麟



麟鳳凰仕隋為內史魏收謂其識度天才必為公輔

李景字道興

李諤字士恢性公方明時務仕隋遷侍書御史

唐李密字元邃遼東人以蒲鶮乘牛掛漢書一帙角上

行且讀楊素奇之時東都賊翟讓聚黨萬人密以

策干讓讓加禮之讓分兵與密別為牙帳號蒲山公

密持軍嚴雖盛夏號令士若負霜雪密殺翟讓王

世充聞之曰密天資明決為龍為蛇固不可測也

李襲譽字茂實通敏有識度擢揚州長史俗不事農襲  
譽為引雷陂水築城塘溉田八百頃民歸本業居家  
儉約以廩祿隨多少厚於宗親以餘資寫書罷歸載  
書數束嘗謂子孫曰吾性不好財以至貧乏然負京  
有賜田十頃能耕之足以食河內千樹桑事之可以  
衣江都書力讀可進求官吾沒後能勤此無資人矣  
李嗣真字承胄趙州人舉明經直洪文館太常缺黃鐘鑄不  
成嗣真居崇業里疑土中有之不得其所道上逢一車有

鐸聲甚厲嗣真曰宮聲也市以歸振於空地若有應者掘之得鍾衆樂遂和天后奇其風度應對召閭元靜圖之楊志誠為贊殷仲容書時以為寵永昌中以御史中丞知大夫事

李靖字藥師京兆人嘗謂所親曰丈夫遭遇要當以功名取富貴何至作章句儒其舅韓擒虎每與論兵輒歎曰可與語孫吳者非斯人尚誰哉高祖擊突厥靖察有非常志自因上急變傳送江都至長安道梗高祖已定京師將斬之

靖呼曰公起兵為天下除暴亂欲就大事以私怨殺誼士乎得釋秦王引為三衛從平王世充以功授開府蕭銑據江陵詔靖安輯進至峽州阻銑兵不得前帝謂逗留詔都督許紹斬靖紹為請而免靖遂陳圖銑十策有詔拜靖行軍總管兼攝孝恭行軍長史軍政一委焉八月大閱兵夔州時秋潦濤瀨漲惡銑以靖未能下不設備諸將亦請江平乃進靖曰兵機事以速為神今士始集銑不及知若乘水傅壘是震霆不及塞耳蕭瑀劾靖靖無所辨頓首謝帝

徐曰隋史萬歲破達頭可汗不賞而誅朕不然赦公之罪  
錄公之功吐谷渾寇邊帝謂侍臣曰靖能復起為帥乎  
靖往見房玄齡曰吾雖老尚堪一行帝喜以為大總管靖  
決策深入多所殺獲殘其國伏允愁蹙自經死改衛國公  
李客師靖之弟有戰功封丹陽公善騎射每出烏雅皆識之  
從之皁噪人謂之烏賊

李彥芳靖之五代孫也家藏高祖太宗詔書數函上之文宗  
賞之

李勣字懋功曹州人本姓徐氏從李密襲黎陽守之密歸朝廷  
其地未有所屬謂長史郭孝恪曰人衆土宇皆魏公有也吾  
若獻之是利主之敗為己功吾所羞也乃錄郡縣戶口以啟  
密請自上之使至高祖訝無表使者以意聞帝喜曰徐世勣  
不肯德不邀功真純臣也賜姓附屬籍 治并州十六年以  
威肅聞帝嘗曰煬帝不擇人守邊勞中國築長城以備虜今  
我用勣守并突厥不敢南賢長城遠矣 勣既忠力帝謂  
可託大事嘗暴疾醫曰用鬚灰可治帝乃自翦鬚以和

藥及愈入謝頓首流血帝曰吾為社稷計何謝為後  
留宴顧曰朕思屬幼孤無易公者公昔不遺李密豈  
負朕哉 太宗時畫像凌煙閣帝自序之 用兵多  
籌算料敵應變皆契事機聞人善抵掌嗟嘆及戰勝  
必推於下得金帛盡散之士卒無私貯然持法嚴故  
人為之用臨事選將必訾相其奇麗福艾者遣之或  
問故答曰薄命之人不足與成功名既沒士皆為流  
涕

李綱字文紀觀州人慷慨有風節仕隋為太子洗馬至  
太宗聽政詔綱與房玄齡王珪侍坐嘗言曰託六尺  
之孤寄百里之命古人為難綱以為易故發言陳事  
毅然不可奪

李大亮京兆人有文武才畧高祖入關大亮自歸授土  
門令擢金州司馬貞觀初嘗有臺使見名鷹諷大亮  
獻之大亮密表曰陛下絕畋獵久矣而使者求鷹信  
陛下意邪乃乖昔旨如其擅求是使非其才太宗報



書曰有臣如此朕何憂古人以一言之重訂千金今  
賜胡瓶一雖亡千鎰乃朕所自御又賜荀悅漢紀曰  
悅議論深博極為政之體公宜繹味之 身三職宿  
衛兩宮每番直常假寐太宗曰公在我得酣卧 大  
亮性忠謹不可干以非義對天子爭是非無回撓

李迥秀字茂之大亮族孫也少聰悟喜飲酒時稱其風  
流妻嘗罵媵婢母聞不樂迥秀即出其妻或問之曰  
娶妻事舅姑苟違顏色何可留後居堂產芝草犬乳

隣猫中宗以為孝感

李百藥字重規德林之子也七歲能屬文號奇童時議裂土與子弟功臣百藥上封建論帝止之授太子右庶子太子戲媒無度作贊道賦以諷之嘗賦帝京篇上嘆其工手銘曰卿何身老而才之壯齒宿而意之新乎侍父母喪還鄉徒跣數千里

李安期百藥子也亦七歲能屬文對高宗曰比見公卿有所薦進皆劾為朋黨所以人人爭緘嘿以避謗若

陛下忘其親仇惟才是用誰敢不竭忠以聞數預決  
國事自德林至安期三世皆掌制誥

李守素趙州人名署天策府倉曹參軍通姓氏學世號  
肉譜虞世南與論人物始言江東尚相酌對至北地  
則笑而不言嘆曰肉譜定可畏許敬宗曰倉曹此名  
豈雅目耶世南曰昔任彥昇通經時稱五經笥今以  
倉曹為人物志可乎

李延壽世居相州貞觀中直國史初父常以六朝南方

謂北為索虜北方指南為島夷其史於本國詳它國略徃徃訾美失當思所以改正未成而沒延壽與論撰所見益廣乃追終先志

李義琰魏州人為相宅無正寢弟義璉為市堂材送之義琰曰吾為相且自愧尚營屋宇是速吾禍卒不許後致仕歸田里公卿以下祖餞於通化門外時人比漢疏廣初使高麗其王據榻召見義琰不拜王為加禮

李義琛擢進士第歷監察御史時文成公主貢金遇盜  
太宗召至曰是人神清爽拔可使追捕義琛去果獲  
賊

李敬玄亳州人該覽羣籍馬周薦其才召除崇賢侍讀  
爲人造請不憚寒暑許敬宗亦薦延之

李日知鄭州人及進士第景龍初知政事安樂公主館  
第成中宗臨幸燕從官賦詩日知獨以規誠 既罷  
不治田園唯飾臺池與賓客娛樂

李懷遠字廣德邢州人擢四科第累遷鸞臺侍郎同平章事卒賜錦衾斂帝自為文祭之

李景伯懷遠子也為諫議大夫中宗宴侍臣命為回波詞或謫言或丐寵至景伯為箴規語以諷帝蕭至忠曰真諫官也

李渤字濬之刻志於學隱廬山久之徙少室元和初李異韋况交章薦之詔以右拾遺召渤謝不拜洛陽令韓愈遺書曰朝廷士引頸東望若景星鳳凰爭先覩

之為快渤心善其言始出家東都每朝廷有闕政輒  
附章列上後以著作郎召 渤孤操自持不苟合於  
世屢以言斥不少衰其節守義者尚之 陳許節度  
使郗士美薨以車部員外郎李渤為吊祭使渤上言  
臣過渭南聞長源鄉舊四百戶今纔百餘戶閩鄉縣  
舊三千戶今纔千戶其它州縣大率相似迹其所以  
然皆由以逃戶稅攤於比隣致驅迫俱逃此皆聚斂  
之臣剥下媚上惟思竭澤不慮無魚乞降詔書絕攤

逃之弊盡逃戶之產償稅不足者乞免之計不數年人皆復於農矣執政見而惡之渤遂謝病歸東都

李中敏字藏之系出隴西擢進士第性剛峭與杜牧李甘善其文辭氣節相上下

李甘字和鼎第進士舉賢良方正異等擢侍御史鄭注求宰相甘曰注何人欲得宰相白麻出我必壞之

李又字尚真趙州人年十二能屬文薛元超曰是子且有海內名擢監察御史劾奏無避後典選事請謁不



行時人語曰李下無蹊徑貴宰有求官者睿宗曰朕  
非有靳李又不可過耳 沉正方雅識治體時稱有  
宰相器事兄孝謹弟兄俱以文章名同為一集號李  
氏花萼集

李嶠字巨山為兒時夢人遺雙筆自是有文辭十五通  
五經二十擢進士第舉制策甲科後遷給事中再召  
為鳳閣舍人 嶠富才思有所屬綴人多傳諷凡為  
文章宿老一時學者取法

李元紘字大綱滑州人本姓丙氏賜姓李氏為雍州司戶時太平公主勢震天下嘗與民競碾磴元紘還之民長史驚趣改之元紘大署判後曰南山可移判不可移元紘再世宰相有清節不治宅第周給親族宋璟嘆曰李公引宋遙之美黜劉晁之貪為國相無留儲雖季文子之德何以加之

李傑本名務光相州人擢明經第先天中進陝州刺史水陸發運使置使自傑始改河南戶有寡婦告子不

孝傑物色非是謂曰子法當死無悔乎答曰子無狀  
寧其悔乃命市棺還斂之使人迹婦出與一道士語  
傑令捕道士按問乃與婦私不得逞傑殺道士內於  
棺

李朝隱字光國京兆人明法中第擢大理丞遷吏部員  
外郎時政出權幸不關兩省而內授官朝隱執罷千  
四百員無所避屈遷長安令宦官有干請曳去之上  
褒諭其能賜中上考以旌剛烈

李尚隱年二十舉明經擢左臺監察御史顯劾崔湜鄭  
愔等斥去後為李師旦雪妖蠱之寃以循吏名

李適之恒山愍王孫為河南尹政不苛細為下所便喜  
賓客飲酒至斗餘不亂夜燕娛晝決事案無留辭

李峴吳王恪孫折節下士長吏治時京師米貴百姓謠  
曰欲粟賤追李峴

李勉鄭惠王曾孫字玄卿從肅宗於靈武擢監察御史  
時武臣無法度背闕笑語譁縱勉劾不恭帝歎曰吾

有勉乃知朝廷之尊 拜嶺南節度使居官久未嘗  
飾器用後歸至石門盡搜家人所蓄犀珍投江中後  
加平章事少貧與諸生共逆旅諸生疾將死出白金  
曰左右無知者幸君以此為塋餘則取之勉諾既塋  
置金棺下後其家謁勉共啟出金付之所得俸賜盡  
資親黨在朝鯁亮廉介為宗臣表

李夷簡字易之鄭惠王四世孫擢進士第中拔萃科致  
位顯處以直道聞歷三鎮家無資產病不迎醫將終

戒母厚塋母事浮屠母碑神道世謂行已有終始

李程字表臣襄邑王神符五世孫擢進士宏詞賦日五色造語警拔士流推之調藍田尉縣有滯獄十年程單言輒判為學士入署常視日影為候日過八磚乃至號八磚學士

李石字中玉襄邑王神符五世孫擢進士第辟李聽幕府聽每征伐必留石主後務占對華敏文宗異之當軸秉權無所撓宦寺氣盛搢紳賴石以為彊

李光弼營州柳城人嚴毅沈果有大畧幼不嬉弄善騎射補河西王忠嗣府兵馬使忠嗣遇之厚嘗曰它日得我兵者光弼也安祿山反郭子儀薦其能詔持節河東節度副大使知節度事兼雲中太守尋加魏郡太守河北採訪使光弼以朔方兵五千出土門史思明等圍饒陽二十九日不下李光弼將蕃漢步騎萬餘人太原弩手三千人出井陘至常山常山團練兵三千人殺胡兵執安思義出降光弼謂思義曰汝自

知當死否思義不應光弼曰汝久更行陣視吾此衆  
可敵思明否今為我計當如何汝策可取當不殺汝  
思義曰大夫士馬遠來疲弊猝遇大敵恐未易當不  
如移軍入城早為備禦先料勝負然後出兵胡騎雖  
銳不能持重苟不獲利氣沮心離於時乃可圖矣思  
明今在饒陽去此不二百里昨暮羽書已去計其先  
鋒來晨必至而大軍繼之不可不留意也光弼悅釋  
其縛即移軍入城史思明聞常山不守立解饒陽之



圍明日未旦先鋒已至思明等繼之合二萬餘騎直抵城下光弼遣步卒五千自東門出戰賊守門不退光弼命五百弩於城上齊發射之賊稍却乃出弩手千人分為四隊使其矢發必相繼賊不能當斂軍道北光弼出兵五千為檜城於道南夾呼沱水而陣賊數以騎兵搏戰光弼之兵射之人馬中矢者大半乃退小憩以俟步兵有村民告賊步兵五千自饒陽來晝夜行七十里至九門南逢壁憩息光弼遣步騎

各三千匿旗鼓並舉潛行至逢壁賊方飯縱兵掩擊殺之無遺思明聞之失勢退入九門 肅宗即位光弼以景城河間兵五千入太原前此節度使王承業政弛謬侍御史崔衆主兵太原每侮狎承業光弼素不平及是詔衆以兵付光弼衆素狂易見光弼長揖不即付兵光弼怒斬衆以徇威震三軍史思明蔡希德高秀岩牛引介引兵共十萬寇太原光弼麾下不滿萬人諸將皆懼議修城以待之光弼曰太原城周

四十里賊垂至而興後是未見敵先自困也乃帥士卒及民於城外鑿壕以自固作塹數十萬衆莫知所用及賊攻城於外光弼用之增壘於內壞輒補之思明使人取攻具於山東以胡兵三千衛送之至廣陽別將慕容湓張奉璋邀擊盡殺之思明圍太原月餘不下乃選驍銳為遊兵戒之曰我攻北則汝潛趣其南攻東則趣西有隙則乘之而光弼軍令嚴整雖寇所不至警邏未嘗少懈賊不得入光弼購募軍中苟

有小技皆取之隨能使之盡其用得安邊軍錢工三  
善穿地道賊於城下仰而侮詈光弼遣人從地道中  
曳其足而入臨城斬之自是賊行皆視地賊為梯衝  
土山以攻城光弼為地道以迎之近城輒陷賊初逼  
城急光弼作大礮飛巨石一發輒斃二十餘人賊死  
者什二三乃退營於數十步外圍守益固光弼遣人  
詐與賊約刻日出降賊喜不為備光弼使穿地道周  
賊營中搯之以木至期光弼勒兵在城上遣裨將將

數千人出如降狀賊皆屬目俄而營中地陷死者千  
餘人賊衆驚亂官軍鼓譟乘之俘斬萬計思明畏敗  
乃去留希德攻太原光弼出敢死士搏賊斬首七萬  
級希德委資糧遁去 代郭子儀為朔方節度使未  
幾為天下兵馬副元帥光弼以河東騎五百馳東都  
夜入其軍兵馬使張用濟入謁光弼斬之思明乘勝  
西嚮光弼整陣徐行趨東京謂留守韋陟曰賊新勝  
難與爭鋒欲誑之以計然洛無見糧危徧難守公計

安出陟曰益陝兵公保潼關可以持久光弼曰兩軍  
相敵尺寸地必爭今委五百里而守關賊得地勢益  
張不如移軍河陽北阻澤潞勝則出敗則守表裏相  
應賊不得西此援臂勢也夫辨朝廷之禮我不如公  
論軍旅勝負公不如我陟不能答判官韋損曰東都  
乃帝宅公當守之光弼曰汜水崕嶺盡為賊蹊子能  
盡守乎遂檄河南縱官吏避賊閉無留人督軍取戰  
守備思明至偃師光弼悉軍趨河陽身以五百騎殿

賊游騎至石橋諸將曰並城而北乎當石橋進乎光  
弼曰當石橋進甲夜士持炬徐引部曲重堅賊不敢  
逼已入三城衆二萬軍纔十日糧與卒伍均少棄甘  
光弼自將治中潭樹壁掘塹賊捨南城攻中潭光弼  
遣荔非元禮戰羊馬賊大潰賊收兵復振與安大清  
合衆三萬攻北城光弼斂軍入登陴望曰彼軍雖銳  
然方陣而囂不足虞也日中當破乃出戰及期未決  
召諸將曰彼彊而可破者亂也今以亂擊亂宜無功

光弼執大旗曰望吾旗麾若緩可觀便宜若三麾至地諸將畢入生死以之退者斬光弼麾旗三諸軍爭奮賊衆奔敗斬首萬餘級俘八千餘人馬二千軍資器械以億計始光弼將戰內及於鞞曰戰危事吾位三公不可辱於賊萬有一不捷當自刎以謝天子及是西嚮拜舞三軍感動加太尉中書令進圍懷州思明來救光弼壁野水渡既夕還軍留牙將雍希顥守曰賊將高暉李日越萬人敵也賊必使擊我爾留此



賊至勿與戰若降與偕來左右竊怪語無倫是日思  
明果召日越曰光弼野次爾以鐵騎五百夜取之不  
然無歸矣日越至壘使人問曰太尉在乎曰去矣兵  
幾何曰千人將為誰曰雍希顥日越謂其下曰我受  
命云何今顧獲希顥歸不免死遂請降希顥與俱至  
光弼厚待之表授特進兼右金吾大將軍高暉聞亦  
降或問公降二將何易也光弼曰思明再敗恨不得  
野戰聞我野次彼固易之命將來襲必許以死希顥

無名不足以爲功日越懼死不降何待寶應元年進  
封臨淮郡王光弼用兵謀定而後戰能以少覆衆治  
師訓整天下服其威名軍中指顧諸將不敢仰視初  
與郭子儀齊名世稱李郭而戰功推爲中興第一其  
代子儀朔方也營壘士卒麾幟無所更而光弼一號  
令之氣色乃益精明云子彙有志操廉介自持遷涇  
原節度使卒

李嗣業京兆人長七尺膂力絕衆尤善陌力每戰爲先

鋒所向摧北廣平王收長安嗣業統前軍持長刃呼  
出軍前殺數千人賊東走遂平長安嗣業忠義憂國  
不計居產前後所賜皆以助軍

李抱玉本安興貴曾孫世居河西沈毅有謀李光弼引  
為裨校安祿山亂上言世占涼州耻與逆臣共宗詔  
賜姓李後破史思明差功第一

李抱真字大玄抱玉從父弟也沈慮而斷上言百姓勞  
逸在牧守願得一州以自試授澤州刺史兼澤潞節

度副使徙懷州凡八年抱真喜士聞世賢者必欲與之游雖小善皆千里邀致之抱真為澤潞副使以山東有變上黨為兵衝而荒亂之餘土瘠民困無以贍軍乃籍民每三丁選一壯者免其租徭給弓矢使農隙習射歲暮都試行其賞罰比三年得精兵二萬既不費廩給府庫充實遂雄視山東由是天下稱澤潞步兵為最

李泌字長源京兆人七歲知為文玄宗開元中悉召能

言佛道孔子者相答難禁中有員俶者九歲升坐詞  
辨注射坐人皆屈帝異之曰半千孫固當然因問童  
子豈有類若者俶跪奏臣舅子李泌帝即馳召之泌  
既至帝方與燕國公張說觀奕因使說試其能說請  
賦方圓動靜泌逡巡曰願聞其畧說因曰方若棋局  
圓若棋子動若棋生靜若棋死泌即答曰方若行義  
圓若用智動若騁材靜若得意說因賀帝得奇童帝  
大悅張九齡因呼小友及長善治易天寶中詣闕得

待詔翰林肅宗即位靈武泌自至陳天下所以成敗  
事帝悅賜金紫拜元帥廣平王行軍司馬二京平李  
輔國以泌親信疾之泌隱衡山代宗立召至舍蓬萊  
殿書閣德宗在奉天召赴行在時李懷光叛歲又蝗  
旱議者欲赦懷光帝博問羣臣泌破一桐葉附使以  
進曰陛下與懷光君臣之分不可復合此葉矣由是  
不赦 太子妃蕭母郅國公主也坐蠱媚幽禁中帝  
怒責太子太子不知所對泌入帝數稱舒王賢泌揣

帝有廢立意因曰陛下有一子而疑之乃欲立弟之  
子臣不敢以古事爭且十宅諸叔陛下奉之若何帝  
赫然曰卿何知舒王非朕子對曰陛下昔為臣言之  
陛下有嫡子以為疑弟之子敢自信於陛下乎帝曰  
卿違朕意不顧家族邪對曰臣衰老位宰相以諫而  
誅分也使太子廢他日陛下悔曰我惟一子殺之必  
不吾諫吾亦殺爾子則臣絕祀矣雖有兄弟子非所  
歆也帝寤太子乃得安會月蝕東壁泌曰東壁圖書

府大臣當有憂者吾以宰相兼學士當之矣昔燕國公張說由是以亡又可免乎明年果卒泌出入禁中事四君時時讜論能寤移人主柳玭稱兩京復泌謀居多其功乃大於魯連范蠡云

李栖筠字貞一趙人體貌軒特為文章有體要族子華稱有王佐才舉進士擢高第李峴為大夫表栖筠為詳理判官悉心助峴峴愛之一時譽出呂諲崔器上三遷吏部員外郎判南曹時選簿多舛判析有條



吏號神明代宗除御史大夫栖筠任風憲見帝依違  
不斷憂憤卒

李吉甫字洪憲栖筠子也以蔭補為太常博士明練典  
故李泌等重之與陸贄有隙贄貶忠州宰相起吉甫  
為忠州欲使害之既至置怨與結歡人重其量在  
外連蹇十年究知利病常病方鎮彊恣言使屬郡刺  
史得自為政則風化可成帝然之又度李錡必反勸  
帝召之德宗以來姑息藩鎮有終身不易者吉甫為

相歲餘凡易三十三鎮殿最分明出為淮南節度使  
奏蠲逋租數百萬築塘溉田萬頃乃築隄關名平津  
堰江淮浙東旱吉甫曰以時救卹召對延英帝尊任  
之官而不名因奏省冗員又奏收佛祠田磴租入以  
寬貧民吉甫請任薛平為義成節度使以重兵控  
邢洛因圖上河北險要帝張於浴堂門壁每議河北事  
曰信如卿料矣吉甫當國引薦賢士大夫褒忠臣  
後以起義烈初政事堂有巨牀相傳徙者宰相輒

罷不敢遷吉甫笈曰世俗禁忌何足疑邪徹而新之  
吉甫自翰林學士為中書侍郎同平章事吉甫謂裴  
垍曰朝廷後進罕所接識君有精鑒願悉為我言之  
垍取筆疏三十餘人數月之間選用畧盡當時翕然  
稱吉甫為得人 吉甫居安邑里時號安邑李丞相  
李鄴字建侯第進士以書判高等補祕書省正字元和  
初拜淮南節度使時兵興天子憂財乏使程异諷諸  
道輸財助軍鄴即籍府庫留一歲儲餘盡納於朝

吐突承瓘為監軍稍厚善數薦之拜平章事鄒不喜  
由宦倖進及出祖謂諸將曰吾老安外鎮宰相豈吾  
任乎固辭

李叔明閬州人擢明經拜洛陽令招徠遺民號能吏遷  
京兆尹長安歌曰前尹赫赫具瞻允若後尹熙熙具  
瞻允斯

李元素字太樸仕為御史東都留守為令狐運辨冤獄  
帝意解

李異字令叔趙州人以明經舉拔萃順宗時杜佑表為  
鹽鐵副使自劉晏後職廢不振異涖職一年較所入  
如晏最多之年明年過之又明年增百八十萬緡  
異天資長於吏事至治家亦如官府吏有過秋毫無  
所縱

李揆字端卿性警敏善文章擢進士第遷禮部侍郎大  
陳書廷中進諸儒曰上選士務得才可盡所欲言人  
人稱美拜平章事帝曰卿門地人物文學皆當世第

一信朝廷羽儀乎故時稱三絕 初苗晉卿數薦元  
載揆輕載地寒謂晉卿曰龍章鳳姿士不見用輦頭  
鼠目子乃求官耶載聞銜之

李絳字深之系本贊皇擢進士宏辭補渭南尉拜監察  
御史元和二年授翰林學士俄知制誥會李錡誅憲  
宗將輦取其貲絳與裴均諫願賜本道貸貧民租賦  
制可 帝欲廢幾二祖之風烈絳曰陛下誠能正身  
厲已尊道德遠邪佞帝曰美哉斯言朕將書諸紳詔

絳與白居易等搜次君臣成敗五十種為連屏張便  
坐帝每閱視 請罷安國佛祠立碑帝悟曰微絳我  
不自知命百牛倒石帝曰比諫官多朋黨論奏不實  
皆陷謗訕欲黜其尤者若何絳曰此非陛下意必憚  
人以此熒惑上心自古納諫昌拒諫亡夫人臣進言  
於上豈易哉君尊如天臣卑如地如有雷霆之威彼  
晝度夜思始欲陳十事俄而去五六及將以聞則又  
憚而削其半故上達者纔十二何哉干不測之禍顧

身無利耳雖開納獎勵尚恐不至今乃欲譴訶之使直士杜口非社稷福也帝曰非卿言我不知諫之益絳奏承璫喪師當抵罪帝怒絳謝曰陛下憐臣愚處之腹心之地而惜身不言乃臣負陛下若犯聖顏旁忤貴倖因而獲罪乃陛下負臣於是帝動容曰卿告朕以人所難言者疾風知勁草卿當之矣帝怪前世任賢以致治今無賢可用何耶對曰聖王選當代之人極其才分自可致治豈借賢異代治今日之人哉



帝曰何知其必賢而任之對曰知人甚難堯舜以為  
病然循其名驗以事所得十七夫任官而辨廉措事  
不阿容無希望依違之辭無邪媚愉悅之容此近於賢  
矣賢則當任任則當久賢者中立而寡助舉其類則  
不肖者怨杜邪徑則懷姦者疾一制度則貴戚毀傷  
正過失則人君踈忌夫然用賢豈容易哉帝曰卿言  
得之矣遷戶部侍郎判本司帝以戶部故有獻而絳  
獨無何哉答曰若以為獻是徙東庫物實西庫進官

物結私恩帝瞿然悟拜中書侍郎同平章事帝謂左  
右曰絳言骨鯁真宰相也遣使者賜醪醕酒魏博田  
季安死子懷諫弱軍中請襲節度吉甫議討之絳曰  
不然今懷諫乳方臭不能事必假權於人權重則怨  
生向之權力均者將起事生患矣衆所歸必在寬厚  
簡易軍中素所愛者彼得立不倚朝廷亦不能安唯  
陛下蓄威以俟之俄而田興果立以魏博聽命帝大  
悅吉甫復請命中人宣慰因刺其變徐議所宜絳獨

謂不如推誠撫納即假麾節他日使者持三軍表來  
請與興則制在彼不在此可奏與特授安得同哉由  
是即拜興節度使絳復曰王化不及魏博久矣一日  
挈六州來歸不大犒賞人心不激請斥禁錢百五十  
萬緡賜其軍從之帝患朋黨以問絳答曰自古人君  
最惡者朋黨小人揣知故常藉口以激怒上心朋黨  
者尋之則無跡言之則可疑小人常以利動不顧忠  
義君子者遇主知則進疑則退安其位不為他計故

常為奸人所乘夫聖人同跡賢者求類是同道也非  
黨也陛下奉遵堯舜禹湯之德豈謂上與數千年君  
為黨耶道德同耳漢時名節骨鯁士同心愛國而官  
官小人疾之起黨錮之獄訖亡天下趨利之人常為  
朋比同其私也守正之人常遭構毀違其私也小人  
多譖言常勝正人少直道常不勝可不戒哉帝言公  
等得無有姻故冗食者當為惜官吉甫權德輿皆稱  
無有絳曰崔祐甫為宰相不半歲除吏八百人德宗

曰多公姻故何耶祐甫曰所問當與不當耳非臣親  
舊孰知其才其不知者安敢與官時以為名言帝又  
問玄宗開元時致治天寶則亂何一君而相反耶絳  
曰玄宗初任姚崇宋璟勵精聽納故左右前後皆正  
人也洎林甫國忠得君專引傾邪之人分總要劇於  
是上不聞直言嗜欲日滋內則盜臣勸以興利外則  
武夫誘以開邊天下騷動故祿山乘隙而奮此皆小  
人啟導從逸而驕繫於時主所行無常治亦無常亂累

封趙郡公

李晟字良器洮州人年十八事王忠嗣從擊吐蕃悍酋  
殺傷甚衆晟挾一矢殪之三軍譴奮忠嗣撫背曰萬  
人敵也晟每與賊戰必錦裘繡帽自表指顧軍前懷  
光曰將務持重豈宜自表暴為賊餌哉晟曰昔涇原  
士頗相畏服欲令見之奪其心耳後懷光軍咸陽有  
異志陰通朱泚反迹寢露晟懼為所并上言當究變  
制備適有使者到晟軍晟乃令曰有詔徙屯即結陣

趨東渭橋 帝進狩梁州顧渾瑊曰渭橋在賊腹中  
兵孤絕晟能辨勝邪瑊曰晟秉義挺忠粹然不可奪  
臣策必破賊帝乃安時晟提孤軍恐當二盜合以軋  
之則偽致誠於懷光乃下令曰見危死節自吾之分  
公等此時不誅元凶取富貴非豪英也渭橋斷賊首  
尾吾欲與公戮力一心建不世之功可乎士皆泣曰  
惟公命於是駱元光等悉從晟懷光懼畏為晟所襲  
乃奔河中 帝益欲西幸晟請駐梁漢以繫天下望

及晟家為賊質左右有言者晟涕曰陛下安在而暇恤家乎晟自東渭橋移壁光泰門以薄都城賊將求戰晟曰天誘之矣勒吳詵等縱兵擊之大破之餘黨悉降晟引軍屯含元外廷遣人分慰居民秋毫無所擾露布至梁帝感泣羣臣上壽且言晟蕩夷凶慙市不易墜宗廟不振長安之人不識旗鼓帝曰天生晟為社稷萬人豈獨朕哉拜中書令自紀其功於碑

涇州倚邊晟因以訓耕積粟實塞下羈制西戎 晟



每進對審審有大臣節治家嚴所言未嘗及公事有  
十五子其聞者愿憲愬聽云

李愬字元直晟子有籌略善騎射憲宗討元濟愬求自  
試遂為節度使不為斥候部伍衆信而安之推誠待  
士故衆樂為愬死山川險易與賊情偽一能曉之於  
是繕鎧厲兵攻馬鞍山拔道口柵襲諸賊吳秀琳於  
是舉文城柵降遂以其衆攻吳房始出吏曰徃亡日  
法當避愬曰彼謂吾不來此可擊也殺其將賊乃走

愬單騎至秀琳柵下署以為將秀琳勸愬用李祐以破賊愬署為六院兵馬使由是始定襲蔡之謀矣時李光顏戰數勝元濟悉銳卒屯洄曲以抗光顏愬知其隙可乘乃遣鄭澥見裴度告師期師夜起以祐為前鋒愬以中軍三千田進誠以下軍殿出文城柵令曰引而東六十里止襲張柴磯其戍較士少休益治鞍鎧發及穀弓會大雪行七十里夜半至懸瓠城旁皆驚驚池愬令擊之以亂軍聲賊恃吳房朗山戍晏如

也祐等坎墉先登殺門者發闕黎明雪止愬入元濟  
外宅蔡吏驚曰城陷矣元濟尚不信及聞號令曰常  
侍傳語始驚詣罪檻送京師屯兵鞠場以俟裴度愬  
以橐鞬見度以宰相禮謁蔡人聳觀乃還屯有詔封  
梁國公徙節度鳳翔復詔帥武寧軍代愿旬日踐父  
兄兩鎮世以為榮時田洪正守鎮州為鎮人所殺愬  
為之素服以令衆衆皆哭又以玉帶寶劍遺牛元翼  
曰此劍吾先人以揃大盜吾又平蔡今鎮人逆天宜

用此夷之元翼感動 愬行已儉約始晟克京師市  
不易肆平蔡亦如之

李愿晟子授上柱國故事柱國門列戟遂父子皆賜

李憲於諸子號最仁孝喜儒以禮法自矜遷衛州刺史  
以治行稱憲善律令性明恕詳正大獄活無罪者數  
百人

李聽字正思為蔚州刺史州有銅冶自天寶後廢不治  
民盜鑄不禁聽乃開五鑪官鑄錢日五萬人文宗每

歎之曰付之兵不疑退處散地不怨唯聽為可

李元諒安息人本安氏冒姓駱後賜姓李鷲敢有謀居  
軍十年士心憚服時兵興倉猝裏屬為鎧剗蒿為矢  
募兵數日至萬餘軍氣乃振貞元三年吐蕃請盟詔  
以軍從渾瑊會平涼元諒以虜情不常請與公連屯  
瑊不聽元諒密徙營次之俄而虜刼盟瑊奔還元諒  
兵成列出虜騎乃解時以為古良將風

李觀其先趙郡人徙為洛陽人吐蕃內寇代宗幸陝觀

率鄉里子姓千人守黑水虜不敢侵後屢平賊有功  
李自良兗州人以戰多授右衛卒為人勤且有謀馬燧  
倚信之表為軍候燧來朝德宗以自良代之自良以  
事燧不敢當議者多其讓帝以河東近胡謂曰守  
北門無易卿者勉為朕行乃以充河東節度使居九  
年民不知有軍上下諧附

李紆字仲舒擢兵部侍郎奉詔為興元紀功述及它郊  
廟樂章論譔甚多

李遜字友道為給事中故事天子以畸日聽政遜奏陛下求治豈宜限以日上從之 遜為政抑彊植弱貧

富均一所至有績可紀

李建字杓直遜弟鄉人爭鬪不詣府而詣建平決無頗貞元中補校書郎 遜建皆舉進士後雖通顯未嘗治垣屋以清儉稱

李藩字叔翰趙州人少沈靖姿體閒美敏學家本饒財姻屬有持去者未嘗問年四十困於廣陵間妻子追

咎藩晏如也後遷給事中制有不便就敕尾批却之  
吏請聯他紙藩曰聯紙是牒豈曰敕耶 節度使王  
鐸賂權近求兼宰相密詔中書門下曰鐸可兼宰相  
藩遽取筆減宰相字署其左曰不可還奏宰相權德  
輿失色曰有不可應別為奏可以筆塗詔耶曰勢迫  
矣出今日便不可止既而事得寢

李景略幽州人客河中大厯末轉豐州刺史豐州當回  
紇通道前刺史柔軟每虜使至與抗禮自景畧至虜



使皆拜於庭盛名顯聞 會梅錄將軍復入朝虜人  
爭坐景略叱之梅錄驚曰非李豐州耶遂就坐將吏莫  
不嚴憚景畧節用約已與士同甘苦鑿咸應永清二  
渠溉田數百頃儲廩器械威令肅然聲雄北疆回紇  
畏之卒於屯

李光進其先河曲諸部姓阿跌氏貞觀中與弟光顏俱  
賜姓為御史大夫故軍中呼大小大夫弟兄榮冠當  
時光進有至性居母喪三年不歸

李光顏字光遠馬燧曰若有奇相終必光大解所佩劍  
贈之從高崇文平劍南數塞旗陷陣出入若神 韓

洪惡光顏忠力思有以撓蟻之乃飾名姝教歌舞六  
博襦褕珠琲舉止光麗費百鉅萬遣使以遺光顏光  
顏曰戰士棄妻子蹈白刃奈何獨以女色為樂為我  
謝公天子於光顏恩厚誓不與賊同生指心曰雖死  
不二因泣下將卒皆為感涕乃厚賂使者還之於是  
士氣益振 光顏性忠義善撫士其下樂為用故數

立勲

李逢吉字虛舟系出隴西舉明經擢進士第 後有八  
關十六子之號

李宗閔字損之鄭王元懿四世孫擢進士舉賢良方正  
為中書舍人典貢舉所取多知名士世謂之玉筍班  
時德裕宗閔各有朋黨互相擠援上患之每歎曰去  
河北賊易去朝中朋黨難 司馬溫公曰夫君子小  
人之不相容猶冰炭之不可同器而處也故君子得

位則斥小人小人得勢則排君子此自然之理也然君子進賢退不肖其處心也公其指事也實小人譽其所好毀其所惡其處心也私其指事也誣公且實者謂之正直私且誣者謂之朋黨在人主有以辨之耳昏主明不能燭彊不能斷邪正並進毀譽交至取捨不在於已威福潛移於人於是讒慝得志而朋黨之議興矣文宗苟患羣臣之難治是猶不種不芸而怨田之蕪也朝中之黨且不能去況河北賊乎

李虞仲字見之第進士宏辭簡儉寡慾時望歸重

李翱字習之進士第為國子博士史館修撰翱性峭鯁  
論議無所屈始從韓愈為文章辭致渾厚見推當時  
李景讓字後已性方毅有守歷中書舍人禮部侍郎王  
播以錢十萬求領鹽鐵景讓詣延英亟論不可遂知  
名 景讓家行修治閨門唯謹門無雜賓居樂和里  
世稱清德者號樂和李公

李德裕字文饒吉甫子也力學大節以蔭補校書郎擢

翰林學士凡號令大典冊皆更其手數召見賚獎優  
崇潤州南方信機祥雖父母厲疾子棄不敢養德裕  
諭以孝慈大倫之義帝數游幸德裕上丹宸六歲  
詔厚謝其意徙劍南西川乃建籌邊樓又請甲人  
弓人弩人分戍諸處卒戶二百取一人使習戰緩則  
農急則戰謂之雄邊子弟總十一軍以制諸賊於是  
二邊寢懼劉稹擅留事以邀節度德裕言捨而不  
討無以示四方因敕諸將取之未幾郭誼持稹首降

策功封衛國公 謂省事不如省官省官不如省吏  
請罷郡縣吏凡二千餘員當國六年方用兵時決策  
制勝它相無與故威名重於時德裕為同平章事入  
謝言於上曰致理之要在於辨羣臣之邪正夫邪正  
二者勢不相容正人指邪人為邪邪人亦指正人為  
邪人辨之甚難臣以正人如松栢特立不倚邪人如  
藤蘿非附他物不能自起故正人一心事君而邪人  
競為朋黨陛下誠能慎擇賢才以為宰相有姦妄者

立黜去之常令政事皆出中書推心委任堅定不移  
則天下何憂不理哉上嘉納之德裕性孤峭明辨有  
風采善文章雖至大位猶不去書謀議援古為質袞  
袞可喜常以經綸天下為任 德裕在位雖遽書警  
奏皆從容裁決率午漏下還第 三鎮每奏事德裕  
引使者戒敕為忠義指意丁寧使歸各為其帥道之  
故河朔畏威不敢慢 所居里第有院號起草亭曰  
精思每計大事則處其中



李惠登營州人拜隨州刺史政清靜居二十年田野闢  
戶口增人歌舞之

李適字子至京兆人舉進士嘗夢與人論大衍數 子  
季卿亦能文舉明經博學宏辭與人交終始恢博君  
子也

李邕字太和揚州人父顯慶中擢崇賢館直學士為文  
選注既冠見李嶠自言讀書未徧願一見秘書嶠曰  
秘閣萬卷豈時日能習耶固請乃假之未幾辭去嶠

驚試問奧篇隱帙了辨如響嶠薦為內史拜侍御史  
帝封泰山還詔獻詞賦帝悅 邕早有名重義入朝  
人間傳其眉目怪異至阡陌聚觀後生望風門巷填  
隘文名天下時稱李北海 盧藏用嘗謂邕如干將  
莫邪難與爭鋒杜甫知其負謗死作八哀詩讀者傷  
之

李白字太白白之生母夢長庚星因以命之十歲通詩  
書蘇頲異之謂學可比相如 輕財重施好擊劍與

孔巢父等居徂山號竹溪六逸 天寶初至長安

賀知章見其文歎曰子謫仙人也言於玄宗召見金

鸞殿論當世事奏頌一篇帝賜食親為調羹 有詔

供奉翰林白與其徒醉於市帝坐沈香亭意有所感

欲得白為樂章召入白已醉左右以水頰面稍解援

筆成文婉麗精切帝愛其才嘗醉使力士脫靴力士

耻之 白驚放與知章等八人為酒八仙白浮游四

方嘗乘月與崔宗之自采石至金陵著宮錦袍坐舟

中旁若無人初游并州見郭子儀奇之文宗詔以白  
歌詩裴旻舞劍張旭草書為三絕

李華字遐升趙州人少曠達外若坦蕩內謹重尚然諾  
每慕汲黯為人中宏辭科遷御史安祿山反母為盜  
所得偽署鳳閣舍人自傷踐危亂不完節又不能安  
親欲終養而母亡上元中以左補闕召華曰烏有隳  
節危親欲荷天子寵乎稱疾不拜作含元殿賦以示  
蕭穎士穎士曰景福之上靈光之下 著弔古戰場

文

李翰擢進士第表張巡死節帝感悟

李觀字元賓舉進士宏辭連中授校書郎屬文不旁引  
前人時謂與韓愈相上下

李賀字長吉七歲能詞章韓愈皇甫湜始聞未信過其  
家使賀賦詩援筆立就自目曰高軒過二人大驚

背古錦囊遇所得書投其中未始先立題然後為詩  
如他人牽合程課者及歸足成之母見所書多怒曰

是兒要嘔心乃已以父名晉肅不肯舉進士愈為作諱辨辭尚奇詭所得皆驚邁絕去翰墨畦逕當時無能效者樂府數十篇雲韶諸工皆合之絃管為協律郎

李商隱字義山為文瑰邁奇古時溫庭筠段成式俱用是相誇號三十六體

李益長於詩與李賀相埒每一篇成樂工爭求之至征人早行等篇天下皆施之圖繪

李穎字德新睦州人少秀悟於詩尤長擢進士第選武功令擢侍御史守法不苛徇為建州刺史以禮法行下建賴以安卒官下喪歸父老相與扶柩塋永樂州為土廟梨山歲祠之

李淳風通羣書明步天厯算制渾天儀占候吉凶若節契然撰麟德厯代戊寅厯候者推最密

五代李襲吉父圖洛陽人或曰唐相林甫之後也乾符中襲吉舉進士去之晉晉王以為榆次令遂為掌書

記襲吉博學多識唐故事遷節度副使官至諫議大  
夫晉王與梁有隙交兵累年後晉王數困欲與梁通  
和使襲吉為書諭梁辭甚辨麗梁太祖使人讀之至  
於毒手尊拳交相於暮夜金戈鐵馬蹂踐於明時歎  
曰李公僻處一隅有士如此使吾得之傳虎以翼也  
李周字通理邢州內丘人唐昭義軍節度使抱真之後  
也內丘人盧岳將徙家太原舍逆旅徬徨不敢進周  
意憐之為送至西山有盜從林中射岳中其馬周大



呼曰吾在此孰敢爾耶盜聞其聲曰此李周也因各潰去周送岳至太原岳謂之曰吾少學星歷且工相人子方順隆準眉目踈徹身長七尺真將相也吾占天象晉必有天下子宜留事晉以圖富貴周以母老辭歸 晉王柵兵青山口周未知所歸乃思岳言至青山歸晉晉王以周為萬勝黃頭軍使後從征伐常有功從戰柏鄉先登遷匡霸指揮使守楊劉周為將甚勇其於用兵善守能與士卒同甘苦梁兵攻周周

堅守久之周聞母喪奔歸莊宗遣他將代周守幾為  
梁兵所破莊宗遽追周還守之乃得不破其後梁人  
已破德勝因東擊楊劉以巨艦絕河斷晉餉援周遣  
人馳趨莊宗求救請日行百里以赴急莊宗笑曰周  
為我守何憂日行六十里且行且獵曰周非梁將可  
敵也比至周已絕糧三日莊宗以巨棧積薪沃油順  
流縱火焚梁艦梁兵解去莊宗見周勞曰微公諸將  
為梁擒矣


宋朝李漬魏野之中表也志尚高隱嘗與野相對吟  
咏終日為詩精絕有唐人風格皆有道之士也 真  
宗祀汾陰以禮聘之悉不起漬嗜酒人或規之曰吾  
以樂吾餘年耳嘗語諸子曰山水足以娛情苟遇醉  
而卒吾之願也一日忽有人至其牀下誦詩云行到  
水窮處未知天盡時言訖不見漬曰吾當逝矣亟命  
家人置酒頃之而卒野聞其死哭之慟後六日亦卒  
天禧四年詔漬野俱贈著作郎野之子間字雲天喜

為詩不樂仕進有父之志仁宗嘉其節賜號清逸處士  
忠義李涓字浩然

李若水字清卿

李邴字漢老濟州任城人樂靜先生昭玘其伯父也崇  
寧五年第進士宣和盛世專掌翰林之職建炎再入  
翰林從駕南渡遭苗劉之變與一二大臣力圖復辟  
嘗草詔云斷螯而立四極既成開闢之功取日而授  
五龍始正神明之御搢紳服其得體拜尚書左丞國

史有傳寓居泉南多遊佳山水賦詩自娛晚從名僧  
遊卒年六十二 子縝維紀綸糾縝少無宦情於書  
無所不讀自號萬如居士嘗賦百梅詩傳於世朱文  
公素敬之為作誌銘綸持節有剛直聲糾之子詵今  
為敷文閣待制學世其家為政廉明所至民安之開  
禧兵禍起時嘗上書乞正首謀二人之罪以謝三軍  
此當時人所難言者



名賢氏族言行類稿卷三十五